

Prome Ministro ta traha den sentido di "Mosterd na de maaltijd"



ORANJESTAD (IPA-VER) Sr. Tico Croes, di fraccion di AVP a bisa cu Promer Ministro Nel Oduber cu ta encarga cu e asuntonan di personal, a tira un discurso unda e ta bisa cu e ta bai tuma un inventarisacion den e aparato gubernamental y cu e ta haci esaki den luz di e maneho di gobierno, cu gobierno a pone como un di su prioridatnan den maneho mehoracion di efectividad y eficiencia di e aparato gubernamental.

Ora cu sr. Tico Croes a tuma nota di e articulo aki den corant y a lesa e discurso di sr. Nel Oduber, e no tabata sa si e mester hiri of yora, pasobra segun sr. Croes, sr. Nel Oduber simplemente no ta compronde e concepto di prioridat.

Esaki pasobra djies aki su periodo como Promer Ministro di Aruba ta termina y manera cosnan ta bayendo seguramente e lo no bolbe bek como Promer Ministro tampoco.

Loke sr. Oduber ta haciendo awor aki, e mester a haci na inicio di su periodo.

Como Ministro di Asuntonan General e mester a haci un inventarisacion di e aparato di gobierno, mira kico ta e demandanan cu tin pa e aparato, y mira con e aparato aki por confronta e demandanan aki y realisa e demandanan cu pueblo ta haci.

Pero kico e Promer Ministro a haci? Ela yena e aparato completamente, ela tranca e aparato, ela crea demotivacion bao di e em-

pleadonan cu e manera di persecucion y di favoritismo pa compinchinan politico.

Nos ta mira cu e eficiencia a bai enormemente atras, e efectividad di gobierno a bai enormemente atras y encunto eficiencia bo por djies tuma un ehempel na Setar, na Postkantoor.

Bo ta mira con e servicio a bai hopi atras.

Tuma un ehempel di e peticionnan pa tereno pa construi cas; cuanto retraso tin den e peticionnan aki.

Kier meen, asina Sr. Croes a bisa, cu loke Sr. Nel Oduber a haci como Ministro di Asuntonan General ta cu ela tranca henter e aparato gubernamental, ela demotiva e empleadonan y awor akinan e ta bin haci un inventarisacion y bin cu reorganizacion y papia di e maneho di gobierno.

Nunca nos a mira un maneho di gobierno aki den sentido di eficiencia, sino al contrario.

Nos a mira ineficiencia y loke ela haci ta cu e consecucionan ta grave pa nos comunidad, pasobra e aparato di gobierno ta demasiado pisa y costoso.

Esaki ta tranca e crecimiento economico. Tin un stagnacion awor den nos economia.

E discurso di sr. Nel Oduber, manera e Hulandesnan ta bisa, ta simplemente "Mosterd na de maaltijd", pasobra ya caba ela danja e aparato y awor a kier bini cu palabranan bunita di inventarisacion.

Sr. Tico Croes a sigui bisando: "P'esey tambe atrobe nos ta bisa sr. Nel Oduber pa laga e cosnan numa manera nan ta, pasobra cu ora cu partido AVP bin bek den gobierno nos lo mester bai haci e reorganizacion profundo, cu realmente ta bai cumpli cu e exigencianan di un sociedad moderno y cu e demandanan di e Pueblo di Aruba y tambe cu e balornan riba cual e comunidad aki semper a basa su mes, cu ta transparencia di gobernacion, locual awor aki no tin al all."

Pasobra awor aki ta favoritismo pa compinchinan so tin. Den tur esaki mester bin cambio.

Na Aruba tin awor aki un delegacion di Surinam y di Antiyas pa un bishita oficial den cuadro di discusionnan parlamentario.

AVP tin nan representantenan den loke nan ta yama e "Begeleidingscommissie".

Diamars atardi e delegacionnan a yega.

Awe tin diferente encuentronan cu gremionan aki na Aruba y tambe atardi lo ta bai tin discusionnan pa e asunto di e "Slotverklaring".

En general, loke sr. Tico Croes a wordo informa door di e representantenan di AVP den e Begeleidingscommissie ta cu e delegacion di Parlamento surinamenjo ta contento cu e recepcion cu nan a haya na Aruba y tambe nan ta masha interesa di mira con e reunionnan lo bai desaroya.

Awor aki ainda ta un

poco prematuro pa bisa con e resultado lo bai ta, pero si nos juzga con e deliberacionnan a tuma lugar dos anja pasa na Surinam, seguramente por bisa cu aki e ambiente lo ta mescos of mihor, asina Sr. Tico Croes a bisa.

E unico punto cu ta un tiki fastioso den e henter e reunionnan aki ta e fayecimento repentino di e politico sr. Leslie Navarro na Corsow, cu a laga toch un sabor di tristeza atras.

Pero na Aruba ta purba logra pa kita un tiki di e sabor di tristeza aki for di nan.

Ta exactamente e lasonan historico aki tabata e motor tras di e hecho pa trece Surinam mas cerca di nos, pasobra e lasonan historico a crea un sentimento di solidaridad cu Surinam, hopi mas profundo cu otro paisnan.

E situacion di inestabilidad na Surinam, e falta

di democracia, e balor cu nos ta kere profundamente den dje, esta democracia, e acercamento a cuminsa entre e tres Parlamentonan aki, cu a conduci como prome parti na un bishita na Surinam, unda pa despues di hopi anja e Parlamento Surinamenjo ta haya bishita di e Parlamentonan di Aruba y di Antiyas.

Logicamente esaki tabata un muestra grandi di aprecio pa e trabao dificil cu nan tabata haci eynan.

Lastimamente esaki no tabatin su efecto mes ora, pasobra nos ta corda cu na December ultimo tabatin problemanan atrobe na Surinam, pero awor nos ta mirando cu poco poco e Parlamento di Surinam ta hayando forma, ta hayando raiznan mas profundo atrobe den e comunidad y cu e respet pa e wega diplomatico na Surinam ta bolbe haya atrobe e bida cu ela conoce promer cu e dictadura na anjanan 80.